



MUHYIDDIN YASSIN bersama Sharudin Md. Salleh (dua dari kanan) dan Mahadzir Lokman (dua dari kiri) menunjukkan buku *Rekayasa Kebudayaan* dalam Majlis Perasmian Persidangan Seni Ekonomi (AEC) 2015 di Kuala Lumpur, semalam. - BERNAMA

Industri seni mampu jana pendapatan

Oleh FARHANA JONI
pengarang@utusan.com.my

■ KUALA LUMPUR 24 MAC

INDUSTRI seni dan budaya tempatan berpotensi untuk dibangunkan bagi membantu menjana pendapatan negara ke arah yang lebih tinggi pada masa akan datang.

Timbalan Perdana Menteri, Tan Sri Muhyiddin Yassin berkata, Malaysia harus mencontohi beberapa negara luar seperti Perancis yang menggunakan hasil seni dan budaya melalui aktiviti pelancongan bagi meraih pendapatan sehingga RM944 bilion.

Katanya, antara aspek yang perlu diberi fokus utama adalah strategi yang digunakan oleh negara luar dalam bidang kesenian bagi menggalakkan aktiviti pelancongan sebagai penyumbang utama kepada pertumbuhan ekonomi masing-masing. "Paris misalnya menggunakan hasil seni dan budaya sebagai tarikan utama pelancong ke negara tersebut seterusnya berjaya menyumbang kepada Keluaran Dalam Negara Kasar (KDNK) yang tinggi selain metakkan bandar raya tersebut pada

kedudukan antara lima buah terkaya di rantau Eropah.

"Di Malaysia, industri kreatif tempatan telah menyumbang kira-kira RM33 bilion kepada KDNK manakala di bawah Program Transformasi Ekonomi (ETP) industri tersebut telah menerima geran RM17 juta untuk menjalankan program jangka pendek bagi tempoh antara 2012 dan 2014," katanya.

Beliau berucap demikian dalam Majlis Perasmian Persidangan Seni Ekonomi (AEC) 2015 dan Pelancaran Buku *Rekayasa Kebudayaan* karya Claude Mollard, di sini hari ini.

Yang turut hadir Duta Perancis di Malaysia, Christophe Penot; Pengasas Galeri Vallette, Patrice Vallette; Pengarah Urusan dan Ketua Pegawai Eksekutif Institut Terjemahan dan Buku Malaysia (ITBM); Mohd. Khair Ngadiron; Pengerusi Institut Terjemahan dan Buku Malaysia, Datuk Dr. Sharudin Md. Salleh; Pengerusi Lembaga Pembangunan Seni Visual Negara, Datuk Mahadzir Lokman dan Ketua Pegawai Eksekutif Razak School of Government (RSOG), Prof. Mayda Dr. Hamidin Abd. Hamid.

Persidangan AEC yang berlang-

sung selama dua hari itu julung kali diadakan di Malaysia sebagai rangka kerja perkongsian dinamik seni dari Timur dan Barat selain bertujuan mengangkat kekayaan budaya serta mempromosikan seni dalam kalangan masyarakat.

Sementara itu, Muhyiddin yang juga Menteri Pendidikan berkata, terdapat beberapa institusi pengajian tinggi (IPT) tempatan kini menawarkan kursus seni dan rekaan antaranya Universiti Teknologi Mara (UiTM), Universiti Islam Antarabangsa Malaysia (UIAM) serta Akademi Seni Warisan dan Budaya (Aswara).

Katanya, kerajaan yakin terhadap potensi kesemua IPT tersebut dalam melahirkan golongan profesional yang berkualiti tinggi untuk menyumbang semula dalam pembangunan industri seni dan budaya tempatan.

Tambah beliau, Kementerian Pelancongan dan Kebudayaan melalui Galeri Seni Visual Negara juga memainkan peranan penting dalam mempromosikan seni tampak menerusi pengelolaan pameran, seminar, bengkel, pertandingan dan aktiviti kesenian.